



Fasnacht 2017

Sujet: **Mol öpis Neus... Venedig bi eus**

„Räge Räge Tröpfli
es ragnet uf mis Chöpfli“
Nei nei kei Angscht mir Dorfplatzrueche
wänd eus nit im Singe versueche
die Tropfe händ mit eusem Sujet z` tue
bringe überall Angscht und kei Rueh
überall wo mir Fasnacht mache
cha me wägem viele Wasser nümme lache.

In allne drei Dörfer hets Wasser gha
mir händ scho emol d` Gummistiefel a
au sehsch bi allne, so hän mir gfunde
en Kanale Grande wie z` Venedig unte
drum finde Dorfplatzrueche Girls und Boys:
„Mol öpis Neus... Venedig bi eus“
und mache Fasnacht in voller Ehre
als venezianischi Gondoliere.

S` Prattler Komitee dass chönne mir verstoh
het wie au mir s` gliche Motto gno
Muttenz tuet ihr Sujetloch stopfe
genau glich miteme Rägetropfe
unseri Nachbere hinterem Chischtepass
händs gliche Sujet numme so zum Spass.

Agfange hets s` goht am ringscht
ganz genau am Samschtig vor Pfingschte
Wassermasse durch d` Schauburgerstross
ins Dorfe abe chasch jetzt mitem Floss
au dr Hagebach tuet sis Unwäse triebe
s` Wasser staut und tuet am Zollmattwäg blibe
dass chann den plötzlich ganz dumm go
will dört tuets Huus für d` Stromversorgig stoh.

Au Muttenz het`s denn betroffe
dört isch s`Wasser bis zum Trämli abe gloffe
das fahrt den nümme das isch kei stuss
drum fahre alli mitem Bus.

Au unseri Nachbere hinter dr Hülfteschanz
machtet mit bi dem Wassertanz
me will es Gitter am Bach vom Grümpel befreie
muess aber höre bevor no öper tuet ine gheie
also muess dr Grümpel liege blibe
und tuet alles Wasser ins Dorf ine triebe.

Aber was eimol chunnt cha wieder cho
die Wissheit blibt witerhin beschtoh
will numme fünf Wuche druf
s`Gliche nomol und wieder eis Puff.

Z` Muttenz isch e Lade an dr Eröffnig dra
die händ scho lescht Mol alles voll Wasser gha
und leider wie chas au andersch si
läuft`s Wasser scho wieder dri
mir hoffe de Lade blibt nit zue
und het für immer vom Hochwasser Rueh.

Au de Prattler isch es nit anderscht gange
wieder eis Hoffe und Bange
Fürwehr und Zivilschutz im Grossisatz
zum dr Isatz do z`Lobe hän mir zwenig Platz.

Was mir au fascht nit chönne glaube
es tuet uns fascht d`Närve raube
fascht jede Obe e riese Stau
uf dr Autobahn, bi Augscht genau
Auto hinter Auto uf jedere Spur
mir froge eus :Was söll das nur?
Doch an dem Obe het`s en andere Grund
s`Wasser chunnt innerte Stund
und uf eimol das isch eso
tuet d`Autobahn unter Wasser stoh.

Nachem Hochwasser stellt me Sandsäck bereit
falls es wieder chunnt, nit alles um Hilfe schreit
in Muttenz chasch die sogar poschte
tüent numme 9 Stützli pro Sack koschte.

Mir hoffe das Eländ isch jetzt verby
und das wärs mitem Hochwasser gsi
au soll's dr Petrus nit übertriebe
damit d`Fasnacht cha troche blibe
den freue mir uns Dorfplatzrueche
wenn mir die drei Dörfer bsueche
und juble:,, Räge Räge Tröpfli
es regnet **nit** uf mis Chöpfli"